

Pádraig Ó Cearbhaill (le cúnamh ó Sara Ní Chonchúir)

Réamhrá é seo a leanas atá ag gabháil le liosta dátheangach de na sráidainmneacha atá i ndlíne áitiúil Chomhairle Contae Bhaile Átha Cliath Theas. D’ullmhaigh Suirbhéireacht Ordanáis Éireann an liosta iomlán de na hainmneacha Béarla i dtús báire go leictreonach agus rinne An Brainse Logainmneacha, An Roinn Gnóthaí Pobail, Tuaithe agus Gaeltachta taighde ar na leaganacha Gaeilge de na hainmneacha. Is é an bhrí atá le ‘sráidainmneacha’ san alt seo ná ainmneacha eastát tithíochta, bloc árasán, bóithre agus sráideanna mar aon le hainmneacha áitiúla eile atá sa cheantar. Freagraíonn Baile Átha Cliath Theas ar an mórchóir don dá sheanbharúntacht riaracháin, **An Caisleán Nua** agus **An Chrois Uachtarach**. Seo é an cur síos a thugtar ar fhairsinge an réigiúin ar shuíomh gréasáin Chomhairle Contae Bhaile Átha Cliath Theas: ‘Tá sléibhte Bhaile Átha Cliath ar an teorainn theas agus síneann sé ón Life i Leamhcán trí Bhaile Phámar, Cluain Dolcáin agus ó dheas go dtí An Caisleán Nua, Ráth Cúil agus Teach Sagard. Tá Tamhlacht Thiar, Theas agus Láir ann agus síneann sé soir go Teach Mealóg agus go Ráth Fearnáin.’

Pléifidh mé le roinnt de logainmneacha stairiúla an cheantair, ainmneacha bailte fearainn agus paróistí chomh maith le sráidainmneacha. Tá úsáid bainte as breis is ceithre fichid ainm bailte fearainn agus paróistí i sráidainmneacha Bhaile Átha Cliath Theas agus is minic a úsáidtear iad i réimse de shráidainmneacha – mar shampla, **Céide na hEascrach, Gléib, Lána, Plásóga, Lóiste na hEascrach, Cúirt Chluain na hEascrach, Cúirt Choill na hEascrach** agus araile. Is as an bhfocal Gaeilge **eiscir**, a bhfuil an bhrí ‘cnocán gairbhéil’ leis, a eascraíonn an focal deiridh sna logainmneacha atá díreach luaithe agam. Ainm paróiste mheánaoisigh is ea **Eiscir**. Tá sé suite le hais Leamhcáin agus is é an túsfhocal é fairis sin in ainmneacha dhá bhaile fearainn sa pharóiste, **Eiscir Thuaidh** agus **Eiscir Theas**. Sa chás seo is focal amháin atá sa bhunlogainm, focal atá intuigthe fós. Is eol dúinn ó fhoinsí eaglasta go raibh *Eskyr* in úsáid chomh fada siar leis an dara haois déag. Ó tharla go dtuigtear gurb é an ceann thoir d’**Eiscir Riada** a bhfuil clú agus cáil uirthi í an ‘eiscir’ seo, is í is bun le sraith nua de logainmneacha i Leamhcán, **Corrán, Céide, Garrán** agus **Bóthar Chaisleán Riada**.

Tá logainmneacha eile ann, ar chuma **Eiscir**, nach bhfuil iontu ach focal amháin agus atá le fáil sna luathfhoinsí, mar shampla paróiste agus baile fearainn na Craobháí (**An Chraobhach** san ainmneach), atá suite ar shleasa shléibhte Bhaile Átha Cliath. Tá ‘Ecclesia de Creuach’, cuir i gcás, ar taifead in *Crede Mihi*, luathchlár Ardeaspaig Bhaile Átha Cliath. Tagraítear don bhunainm Gaeilge, **An Chraobhach**, i ndán a cumadh sa dara leath den séú haois déag ina n-adhmholtar an chreach a thug Aodh mac Seaáin Ó Broin, taoiseach chríoch **Ghabhal Raghnuill** i gCo. Chill Mhantáin, leis as áiteanna éagsúla i ndeisceart Co. Bhaile Átha Cliath agus as áiteanna eile chomh maith. Áit chraobhach, nó áit faoi chrainn, is brí leis an ainm.

Sampla eile de logainm a théann siar i bhfad agus gan aon fhocal á cháiliú, is ea **Tamhlacht (Tamlachta** tráth dá raibh) i nGaeilge, an mhainistir cháiliúil a bhunaigh Maolruain (**Máel-Rúain** tráth) a bhásaigh sa bhliain 792. Tá roinnt áiteanna éagsúla ann ar a nglaoitear **Tamhlacht** agus creidtear go seasann sé d’ionad adhlactha réamhChríostaí. Tá sé le tuiscint as taighde a rinne An Brainse Logainmneacha go mb’fhéidir go bhfuil an focal **Tamhlacht** in ainm an bhaile fearainn *Rowlagh* atá ó dheas ó Bhaile Phámar (in aice le Séipéal Iosóid). Bhíodh sé i seilbh Ospidéal Naomh

Eoin Baiste a bhunaigh Ailred ‘Palmerus’, buafhocal atá beo fós sa logainm **Baile Phámar**. Dealraíonn sé gur athscríobh ar an leagan Gaeilge **Rua-Thamlacht** (a ndearna **Rualach** de) iad na samplaí luatha de *Rowlagh*, ar nós *Rouelachteg* agus *Roueholachteig* atá ann ó thart ar 1190 agus atá ar fáil i gClár an Ospidéil réamhluaithe (*Register of the Hospital of S. John the Baptist*).

Is cinnte gur seanainm é (**An**) **Dothra**, cé nach léir a bhrí. Ritheann an abhainn le hais **Bóthar na Bruíne**. Is ionann **bruíon** (‘hostel’) an logainm dheireanaigh agus **Bruiden Da Derga** agus cuirtear síos ar an toghail a rinneadh uirthi i seanscéal cáiliúil Gaeilge. De réir an scéil sin bhí an Dothra ag rith tríd an mbruíon féin.

Logainm eile is ea **Sceach** nach bhfuil ann ach focal amháin; sin ainm baile fearainn atá ar theorainn Co. Chill Dara, i bParóiste an Chaisleáin Nua. Tá sé le fáil i bhfoinsí luatha freisin agus é cáilithe ag ainm pearsanta. Sna nótaí a cuireadh le Féilire Aonghasa timpeall is an t-aonú haois déag – i Mainistir Thamlachta a rinne Aonghas mac Aonghobhann, dalta Mhaolruain, an féilire bunaidh úd i véarsaíocht shiollach thart ar 800 – scríobhadh, gur maraíodh duine áirithe darbh ainm **Conlaed**, príomhcheardaí Naomh Bríde, ‘ic Scethaib Connla i taib Liamna i Maig Laigin’, sé sin ‘ag **Sceachaibh Connla** taobh le **Liamhain** i **Maigh Laighean**’. Ó tharla gur chuid d’aonad talún nach ann dó a thuilleadh, ach ar a dtugtaí *Tibberbride* nó *Tobberbride* i bhfoinsí ón seachtú haois déag, é baile fearainn *Skeagh* / **Sceach** an lae inniu agus ó tharla gurb ionann *Tobberbride* agus **Tobar Bhríde** i nGaeilge, cuireann sé sin leis an tuiscint gurb ionann **Sceich** (ainmneach iolra **scé**, **sceach** na Nua-Gheilge) **Connla** agus *Skeagh*.

Áit mhór le rá ba ea **Liamhain** a luadh roimhe seo ar feadh i bhfad. Is ann a bhí príomhphort ríshliocht **Uí Dhúinchadha** Laighean tráth agus tá a n-ainm caomhnaithe sa logainm Gaeilge **Carnán Cluana Uí Dhúinchadha**, a bhfuil an leagan giorraithe **An Carnán** air anois, nó *Dolphin’s Barn* i mBéarla. De réir **Leabhar na gCeart**, a scríobhadh san aonú haois déag, dúnfort de chuid ‘Gaill’ (lochlannaigh) Átha Cliath ba ea **Liamhain** faoin tráth úd. Ba iad na hAngla-Normannaigh a thóg **An Caisleán Nua** sa limistéar céanna, mar is léir ó thagairtí luatha dó ar nós ‘Newcastle de Leuan’ (1223), ‘de Novo castro de Lyouns’ (1340) agus **Caislén Nua Liamhain** ina dhiaidh sin sa dán adhmholta a luadh roimhe seo faoi Aodh Ó Broin atá sa **Leabhar Branach**. Tá **Liamhain** tagtha anuas chugainn sna logainmneacha *Lyons Hill* / **Cnoc Liamhna** agus **Paróiste Liamhna** i gCo. Chill Dara agus in ainm eile fós atá i bhfad níos nuaimseartha ná iadsan, *Lyons Road* / **Bóthar Liamhna** ar an teorainn idir Co. Chill Dara agus Co. Bhaile Átha Cliath. Ní hé an bunús céanna atá le *Knocklyon* áfach, áit atá suite timpeall is cúig chiliméadar déag níos faide soir idir Baile Baodáin agus Teach na Giúise. *Cnoclin* agus *Cnoclyn* na leaganacha a tugadh ar an logainm deireanach i rollaí riaracháin thosach an ceathrú haois déag. Is léir gur siolla amháin atá sa dara cuid den logainm agus b’fhéidir gurb é an ginideach uatha de **líon** atá ann, ainmfhocal a bhféadfadh an chiall ‘flax’, ‘net’ nó ‘snare’ a bheith leis i mBéarla. Dá bhrí sin, tá na leaganacha Gaeilge de *Knocklyon*, *Knocklyon Road* agus araile mícheart mar atá ar na comharthaí, .i. **Cnoc Liamhna**, **Bóthar Chnoc Liamhna**. **Cnoc Lín** an leagan ceart.

Is ait an rud é go bhfaightear macasamhail na logainmneacha Gaeilge atá pléite go dtí seo agam, gan iontu ach aon fhocal amháin (agus an t-alt leo uaireanta), i gcineál áirithe ainmníochta atá san fhaisean in Éirinn na linne seo. Sa chineál seo ainm nuaimseartha, faightear alt cinnte an Bhéarla agus ainmfhocal ina dhiaidh, ainmfhocal a

bhféadfadh baint a bheith aige leis an logainmníocht agus ar minic leis a bheith doiléir agus neamhchoitianta. Seo roinnt samplaí atá i limistéar Bhaile Átha Cliath Theas: *The Briars, The Coppice, The Covert, The Dingle, The Garth, The Oval, The Paddocks, The Tudors* agus *The Sacra*. Pléifidh mé an t-ainm deireanach sin ar ball.

Aicme thábhachtach logainmneacha luatha is ea iad siúd a bhfuil téarmaí lonnaíochta eaglasta iontu. Tá roinnt láithreacha eaglasta i mBaile Átha Cliath Theas a dtosaíonn a n-ainmeacha le **Cill**, focal iasachta ón Laidin agus an chiall eaglais leis de ghnáth. Is as **Cill Mhaighneann** (**Cell Maignenn** anallód) a d'eascair *Kilmainham* atá i limistéar Chomhairle Cathrach Bhaile Átha Cliath. 'Maigniu abb. Cilli Magnenn' a thugtar ar an ab a bhfuil a ainm caomhnaithe sa logainm úd i bhFéilire Thamhlachta, féilire a cuireadh i dtoll a chéile i Mainistir Thamhlachta thart ar an mbliain 800 (ach roimh Fhéilire Aonghasa). Tá **Cill na nIníon** / *Killinninny* suite, 'i ttaobh Tamhlachta andes' (.i. 'in aice le Tamhlacht ar an taobh theas') de réir mar atá mínithe i bhFéilire Uí Ghormáin (a cuireadh i dtoll a chéile thart ar an mbliain 1170c). Ghairtí iníonacha Mhic Iair chomh maith ar na ban-naoimh dá dtagraítear sa logainm sin. Go deimhin, tá roinnt ceall ann a ainmníodh i ndiaidh iníonacha duine faoi leith mar atá **Cill Iníon Léinín** i nDún Laoghaire-Ráth an Dúin agus **Cell Ingen nAilella**, nach bhfuil ann a thuilleadh ach a bhí suite in aice le **Liamhain** de réir ceann de na nótaí a cuireadh le Féilire Aonghasa. Tá an bhrí atá le **Cill an Ardáin** / *Killinardan* soiléir. 'Cell Manach Escrach i nUíbh Dúinchada' (.i. **Cill Manach** [le hais] **Eiscir** [i gcríoch] **Uí Dhúinchadha**) an tslí a dtagraítear do **Cill na Manach** / *Kilnamanagh* i nGinealaigh na Naomh Éireannach. Meastar go bhfuil **Cill Mochuidbhríocht** tiomnaithe do Naomh Cuthbert, manach Angla-Shacsanach a bhí ina easpag ar Lindisfarne sa seachtú haois. Tá samplaí luatha den logainm deireanach sin ar taifead i gClár an Ardeaspaig Alen, leithéidí, *Kylmaccudricke* agus *Killmacodricke*.

Focal dúchasach Gaeilge is ea **teach** nó **tigh** (an tabharthach uatha ó cheart). Is minic an chiall eaglais leis i logainmneacha, ar nós an logainm *Tymon* i mBéarla a bhfuil an litriú **Tigh Motháin** air anois i nGaeilge ach gurbh fhéidir gurbh as **Muadhán**, ainm naoimh, a tháinig an dara cuid den ainm. Cuireann foirmeacha luatha *Templeogue*, a bhfuil an litriú **Teach Mealóg** air i nGaeilge anois, an t-ainm pearsanta **Mológa** / **Dológa** i gcéill, leithéidí *Teg Dologa* (deireadh an dara haois déag) agus *Tachmelog* in *Crede Mihi*. Is minic **Mo-** nó **Do-** a bheith i dtús ainmneacha ceana naomh, leithéid **Mochua** Chluain Dolcáin dá ngairtear **Crónán** freisin sna luathfhoinsí. Feictear sampla eile d'ainm ceana naoimh i leaganacha luatha den logainm **Teach Sagard**, mar atá 'Moshacru in Tech Tacru' i bhFéilire Thamhlachta. Tabhair faoi deara go scríobhtar an fhuaim /g/ mar *c* i lár focal i litriú na Sean-Ghaeilge mar atá le feiceáil in ainm an naoimh réamhluaite, **Moshacru**. **Teagh Thagra** an litriú Nua-Ghaeilge a bhí ar an logainm ina dhiaidh sin san aiste filíochta ón séú haois déag i dtaobh Aodha Uí Bhroin a ndearna mé tagairt dó roimhe seo. Bhí sé ar taifead mar *Tassagard* (fara leaganacha malartacha) i gcáipéisí Laidine ón tríú haois déag agus níor tharla an giorrú go *Saggard* go dtí an seachtú haois déag. Ní gá a rá nárbh as an bhfocal Gaeilge **sagart** a tháinig an logainm. Is cóir a lua freisin go dtaispeánann *The Sacra*, ainm ar bhloc réasúnta nua árasán i limistéar **Theach Sagard**, míthuiscint amach is amach ar bhunús an logainm seo. Leagan eile ar an bhfocal **Teach** atá le fáil i logainmneacha i dtuaisceart Laighean is ea **Steach** nó **Stigh**. Logainm nach bhfuil ann anois, ach a bhí i gcomharsanacht Bhaile Phámar tráth, is ea **Steach Guaire**. Dealraíonn sé gur **Teach** / **Steach** a bhí i dtosach an logainm seo a leanas chomh

maith, de réir na samplaí ón gceathrú haois déag atá caomhnaithe in *Alen's Register: Staghcony, Taghcummy*. I dtús an seachtú haois déag, tugadh *Stagoni, Stagonny, Teggonnagh* (?) ar an áit chéanna agus ina dhiaidh sin, scríobhadh *Tygunny* i dtús an naoú haois déag. Is ionann é agus *Gunny Hill* sa lá atá inniu ann, le hais *Oldcourt / An tSeanchúirt*. Measaimidne gur **Teach gConaigh** ('the house of **Conach**') an t-ainm ceart Gaeilge agus go bhfaightear an t-ainm pearsanta céanna sa logainm **Ard Conaigh**, seanláthair eaglasta de chuid Chúige Laighean atá luaite i nGinealaigh na Naomh Éireannach, nach bhfuil a suíomh ar eolas a thuilleadh.

Seachas téarmaí lonnaíochta eaglasta, is féidir tionchar na heaglaise a thabhairt faoi deara in ainmneacha pearsanta. Is as **Baile Maoilíosa** a eascraíonn *Ballymaice* mar shampla, atá suite i bparóiste sibhialta Thamhlachta. Searbhónta (.i. **Maol**) Íosa is brí leis an ainm pearsanta atá i ndiaidh **baile** sa sampla seo. Ainm a bhí coitianta go leor i measc lucht Eaglasta ab ea **Maoilíosa** mar is léir ó na hAnnála luatha Éireannacha. Aistriú Béarla ar an logainm **Baile Uí Rónáin** is ea *Ronanstown* i bparóiste Chluain Dolcáin. Is fada an t-ainm **Rónán** ceangailte le mainistir Chluain Dolcáin agus tá bás 'Fiachna ua Rónáin airchinneach Cluana Dolcáin' sa bhliain 1086 ar taifead in Annála éagsúla. Agus ar deireadh thiar chomh fada is a bhaineann sé le hainmneacha eaglasta de, 'baile (fearainn) na mban rialta' an chiall atá le *Calliaghston / Baile na gCailleach* i bparóiste Ráth Cúil a bhí i seilbh chlochiar Mhuire Hogges i mBaile Átha Cliath tráth.

Tá úsáid bainte as ainmneacha roinnt mhaith de na naoimh a pléadh thuas chomh maith i sráidainmneacha Bhaile Átha Cliath Theas, leithéidí **Cúirt Aonghasa / St. Aongus' Court**, **Céide Bhríde / St. Bridget's Drive**, **Cúirt Chuidbhricht / St. Cuthbert's Court**, **Páirc Mhaolruain / St. Maelruan's Park**, **Cill Chrónáin / Kilcronan** agus **Cluain Crónáin** (ainm nua-aimseartha Gaeilge). Thagair mé cheana féin do mhainistir Lindisfarne in oirthuaisceart Shasana nuair a labhair mé faoi Naomh Cuthbert. Ba é Naomh **Aédán (Aodhán** i litriú na Nua-Ghaeilge) a bhunaigh mainistir Lindisfarne agus freisin mainistir Mhaolrosa in Albain. Sin é is bun le sráidainmneacha mar **Ascaill Lindisfarne / Lindisfarne Avenue**, **Ascaill Mhaolrosa / Melrose Avenue**, **Clós Aodháin / St. Aidan's Close**.

Gné amháin eile de na logainmneacha ar mhaith liom tagairt di is ea an tionchar iasachta. Is tearc logainm de bhunús Lochlannach atá i mBaile Átha Cliath Theas cé go bhfuil tionchar na Lochlannach sa réigiún ar taifead i gcáipéisí. Déantar tagairt don dúnfort Lochlannach 'Dun Amhlaim oc Cluain Dolcain' (.i. Dún Amhlaíbh) in Annála Uladh sa bhliain (cheartaithe) 867, nuair a dhóigh fórsaí Éireannacha é. Leagan Gaeilge de *Áleifr* na Sean-Ioruaise is ea **Amhlaíbh (Amhlaioibh** ina dhiaidh sin). Is i nGaeilge, ar ndóigh, atá ainm an dúnfoirt ar taifead sna hAnnála. Ar an lámh eile is de bhunús na Sean-Ioruaise an logainm *Leixlip*. Láthair ina léimeann bradáin an chiall atá leis agus é ag tagairt d'eas ar an Life. Ina dhiaidh sin tugadh an t-ainm isteach sa Mheán-Bhéarla seachas sa Ghaeilge. Go deimhin, níor glacadh formhór logainmneacha Ioruaise na hÉireann isteach sa Ghaeilge.

Tiocfaimid ar aghaidh anois go dtí an tréimhse Angla-Normannach agus feicfimid go dtagraíonn roinnt d'ainmneacha na mbailte fearainn atá sa réigiún don ghné mhíleata den ghabháil, ainmneacha fearacht **An Caisleán Nua** a luadh cheana agus **Caisleán Bhairnín / Castlwarden** atá ar theorainn Co. Chill Dara. Tá an dara ceann díobh seo ar taifead i gClár Mhainistir San Tomás, Baile Átha Cliath mar *Castellum Warin*

(timpeall na bliana 1195) agus i gcáipéis eile fós mar *Castell Warnyng* sa bhliain 1495, agus rinne **Caislén Bharruin** (nó **Bairnin**) de i nGaeilge faoin séú haois déag (féach **An Leabhar Branach** mar leis sin de). Tagraítear do bhaile fearainn **An Briotás** / *Brittas* in *Alen's Register* mar *le Bretage, Bretas, Bretach* chomh maith le leaganacha malartacha eile. Tá an leagan **briotás** le fáil i gcáipéisí Gaeilge agus is as an bhfocal Angla-Normannach *bretasse* é, a bhfuil an bhrí caiseal sealadach uchta déanta as adhmaid leis. Is díol spéise í an áit ina bhfuil **An Briotás** suite – ar theorainn thiar theas Co. Chill Mhantáin – nuair a smaoinítear ar an gciall atá leis an logainm.

Is ainmneacha luatha de bhunús Béarla na bailte fearainn seo a leanas: *Stannaway* (ar theorainn Bhaile Átha Cliath Theas) a scríobhadh mar *Stony wey* sa bhliain 1296; *Newlands* dár tagraíodh mar *le Newland* sa bhliain 1313; *Coldcut* ar ar tugadh *Coldecot* sa bhliain 1435, agus a bhfuil an chiall both fhuar leis; *Hazelhatch* a scríobhadh mar *Haselhyrst* sa bhliain 1405 agus a chiallaíonn collchoill. Is as sloinne Angla-Normannach a scríobhadh mar *Bakepuz, de Bakepuz* agus araile i gcáipéisí go deireanach sa tríú haois déag a eascraíonn *Backweston* a bhí ar taifead mar *Bakbyestoun* sa bhliain 1395. Sloinne áitiúil é atá bunaithe ar an logainm *Bacquepuis* sa Normainn. Tá an sloinne le fáil chomh maith sa chuid dheireanach den logainm *Kingston Bagpuize* in Oxfordshire i Sasana. Ainmníodh *Johnstown* i bparóiste Ráth Cúil i ndiaidh ‘John son of John de Penris’ (1236). Sloinne áitiúil is ea ‘Penris’ chomh maith mar gur as an logainm Breatnaise *Pen-rhys* é.

Tá ainmneacha eile de bhunús iasachta i mBaile Átha Cliath Theas agus ní sine iad ná an t-ochtú nó an naoú haois déag, leithéidí *Argos* (áit stairiúil sa Ghréig), *Gibraltar*, *Mountpelier* agus *Portobello*. Ar ndóigh bíonn logainmneacha iasachta go mór san fhaisean nuair a bhíonn sráidainmneacha á gceapadh sa lá atá inniu ann in Éirinn. Is samplaí iad seo a leanas de logainmneacha iasachta éagsúla atá le fáil i measc sráidainmneacha Bhaile Átha Cliath Theas:

Airton (Airton Road), Aylesbury, Beverly, Cherbury, Eaton, Hanbury, Kennington, Kew, Rushbrook, Westbourne agus *Willington* (logainmneacha de chuid Shasana iad sin go léir);

Airlie, Drysdale agus *Fettercairn* (as Albain) – ar an lámh eile seans gur tagairt don tae atá i *Tay Lane* agus nach tagairt don abhainn *Tay* / **Tatha** atá ann;

Bewley (< *Beaulieu*) agus b’fhéidir *Tournville* (as an bhFrainc);

First – Fourth Avenue (Nua Eabhrac is dócha!).

Ar ndóigh is iomaí sráidainm i mBaile Átha Cliath Theas a d’eascair as ainmneacha stairiúla de chuid an cheantair, mar **Ascaill Bolbrook**. B’as *Bolbrook Paper Mill* i dTamhlacht a tháinig an t-ainm sin agus tá sé le feiceáil ar an gcéad eagrán de léarscáil sé orlaigh sa mhíle na Suirbhéireachta Ordanáis (Co. Bhaile Átha Cliath, foilsithe 1837). Tugadh *Bolbrook Paper Mill* air roimhe sin ar léarscáil Co. Bhaile Átha Cliath (1821) a rinne William Duncan. Is é is dóichí gur bunaíodh an t-ainm ar an sloinne *Archbold*, déantóir páipéir, a raibh an muileann sin ina sheilbh aige i lár an ochtú haois déag.

Mar fhocal scoir críochnóidh mé an réamhrá seo le cúpla sráidainm ar chinn sé ar an mBrainse Logainmneacha a mbunús a oibriú amach ainneoin ár ndíchill: **Ascaill Delaford, Bóthar Kennelfort, Céide Magna** agus **Clós De Selby**. Ach mar a tharlaíonn tá an t-ainm *De Selby* mar ainm ag Flann O’Brien ar charachtar ina úrscéal *The Third Policeman*!